

1 JOHN

Keriso amo vasiri te irari ta ke

1 ¹Eto enda ae pekota amo ungotenau orekari embo mitiaetija amita ke avo dago apostels na onde na ingihara titi na kogara ingen na tame uera eto vasiri te irari ta ke amita degi ta eto puvuja amita ke avo ungota degi ta ere kaitera. ²Eto Keriso amo Mamoga mitiaetija te ikenu enda ta puvunu titi na kogara avoeto vasiri te daroho irari amo amita degi ta, avo nango na ungota degi hande eora. ³Eto dago na Mamo te Meni Iesu Keriso amiga tunga vahai ue osa mine ara eora ai ta kaju avote do ingihara eto do kogara avo ungota degi hande ereora ⁴eto ere kaetera avo ungo kogue ururovo nango tunga javotoho be aisora.

God amo usasara

⁵Eto God ta Meni ta degi ke ingito ungota degi hande eora amo erekira: God amo usasa avoeto amita degi mume irae be ⁶avoeto ungotena God ga tunga vahai eto osa osa ari ke ijie mume ta mitera amo ari na eto ke na sokova erera. ⁷Rate God usasa ta mitia avoeto usasa ta mitie tunga vahai ue osa osa te tapa iriroro God ta Meni Iesu ta sasaga na ungotenau ari sasapura tapa egeoi irae euja. ⁸Eto ungotenau ari sapura irae ke asora amo ungotena ke be ari haite mane rate ke sokova eora. ⁹Rate God ta degi ari sasapura harikitiroro amina ari javotoho ikasi onde ena amo ari sasapura hotembeto toturitie jo egau javotoho aisuja. ¹⁰Rate ari sapura irae ke asora amo God ke sokova ke asora avoeto ke amita avo jo ungotenau ta irari haite mane aisuja.

Iesu Keriso ungotenau hondate ari embo.

2 ¹Nau meniundi ungo ari sapura mane ava ke erevi ere kaitona te inena ari sapura aisoa kito embo javotoho Iesu Keriso amina God ta degi ke ijie ungotena ere orekitia. ²Eto Iesu Keriso avoembo ungotenau ari sasapura hotembeto touja amo ungotena ari sapura ta pene na matu ombari eto ungotenau pere mane rate enda tapa embomeni ta pene ra. ³Eto ungotena God kiari retemo kiaere amita eto kiari amo erekira, amo

God ta ke peni avo ambo ambo asora amo God be kesora ⁴te embo na God kiari ke ijie amita ke peni ambo ambo ae asuja amo ke sokova embo eto ke be ari haite mane ⁵⁻⁶rate God ta osa ari na God ta ke peni amita agi euja embo amita jo ta pajito enetasuja. Eto embo na God ta jo ta matu torari ke ijie kito Iesu na do ue mitiaetija avo pere ururou kito amo God ta embo be ke aetera.

God ta ke peni eha

⁷Eto nau tunga umbari embomeni ungo God ta ke peni erevi ava ere kaitena amo ke eha mane itikari ta eto ungota degi ikari eto ungota degi matu hande ari aravora ⁸te ungota jo ta mume irae oi iho bujarako oi ke matu amo eha puvurarako ere ua ke peni amo “osa mine ara evujo” Keriso na ere uaelija ainge nombo ere ova avoeto ungota jo usasa ere ua. ⁹Rate embo amuna usasa ta irari ke ijie namei tumo aisuja amo mume ta mitia aravora. ¹⁰Te embo amuna namei osa aisuja amo usasa ta mitia avoeto teto be ari mane joru aisuja ¹¹rate namei ta degi tumo euja embo amina mume ta mitie nainge nainge ere pahua amo be kiaera, mume avoeto kiari inono ae ra. ¹²Nau meniundi ungota ari sasapura God na Iesu ta javota hotembeto tona amita degi ere kaitena ¹³eto ungo embo okokose daroho irari embo amo ungo kiari avoeto ungota degi ere kaitena, eto ungo embo ehaha ungo na Ari Sapura embo Satan, sovera eto nembari avoeto ungota degi ere kaitena. ¹⁴Eto meni memeni ungo God Mamo matu kiari avoeto ungota degi ere kaitena. Eto ungo embo okokose ungota degi kaetena amo ungona itikari ta eto irari embo kiarira avoeto kaetena. Eto ungo embo ehaha sovera eto mitiouve God ta ke ungota jo ta mitouva amina Ari Sapura embo nembeto ere ova avoeto ungota degi kaetena. ¹⁵Ungo enda te eto enda ta donda tapa amite avo osa avojo. Eto embo na enda ta donda osa asuja amo God Mamo ta osa ari, embo amita jo ta mane torasuja. ¹⁶Amita be amo enda ta ari sasapura tapa bisi ta hamota ujeje sasapura amite eto donda neite neite umbari amite eto embo ta titi ta embo peni asi hotembari amite tapa eingeko amo God Mamo ta degi puvurae rate enda ta vasiri na puvuja. ¹⁷Eto enda eto enda ta ujeje tapa amo irae asi ere puvutuhua te God ta ke agi ari embomeni amina daroho iresora.

Keriso ta kitoho

¹⁸Nau meniundi ungotena iji tutumo auvetija amo iji tutumo auvitiro Keriso ta kitoho puvuroja ke eore ingiora amo kitoho nei nei amo matu puvuto mitera avoeto iji tutumo matu auvetija. ¹⁹Eto Keriso ta kitoho amo ungotena vahai mane rate ungotenau eklesia ta jo ta eto puvuto pambera. Eto ungotenau toho kito mane pambaetera te ungotenau toho mane avo embo na kiora toto pambera. ²⁰Rate Keriso na ungota jo ta

Ahihi Otohu overekena avoeto ungo ke be kiarira. ²¹Eto ungo ke be kiari eto ke be ai ta ke sokova irae amo ungo kiari avoeto ungota degi ere kaitena ²²rate embo amuna Iesu amo Keriso ungotenau orekari embo mane ke aisuja amo ke sokova eria avoeto Keriso ta kitoho ra eto Meni ke be ae ue Mamo te tapa ke be ae euja ²³eto God Meni ke be ae euja, embo amina God Mamo te tapa ke be ae euja te God Meni umbuja amo Mamo te tapa umbasuja. ²⁴Avoeto ungo itikari ta eto ke umbeve ungota jo ta vovaja avo simba evujo eto ke avo egikae iketo mitie ungonna Mamo te Meni te ga kajueto daroho iresova. ²⁵Eto Keriso na pe amita na onde ena amo vasiri te daroho irora onde ena. ²⁶Ungo degi aemo kateto pambava ke sokova onde katari embopo avo kiova ke erevi ere kaitena ²⁷te Keriso na ungota jo ta Ahihi Otohu overekena avoeto ungota degi Ahihi Otohu mitia avoembo ungo embo nei amuna mane ate poekara hotembasova te Ahihi amina javotoho davore sapura davore ate poekasuja amo ke sokova irae ke be pere avoeto ke tapa asi ue Keriso ta toho eto irivujo. ²⁸Avoeto nau tunga umbari meniundi, Keriso ta jo ta irivujo eto mitirovo Keriso egerembeto puvurou me kogue mane ondikasova te titi vuju ta hetasova. ²⁹Eto Keriso ari javotoho ari embo amo ungo kiarira avoeto ari jajavotoho ari embomeni amo God ta meniundi avo be kivujo.

Ungo God ta meniundi ra.

3 ¹Eto kivujo, God Mamo na ungotena osa pajire be ere ua avoeto ungotena amita meniundi ke euja avoeto ungotena amita meniundira te enda embomeni God kiae avoeto ungotenamote tapa kiaera. ²Eto nau tunga umbari embomeni ungotena eha emo God ta meniundira te ambota embo ta hamo uhu hajire do ainge asuja amo God na ae ingae rate ungotena kiari amo Keriso amo hajire do ainge ere ua amo egerembeto puvurou titi na be kesora avoeto amita tombu vahai ainge aisora. ³Eto Keriso amo tongopa ambu avoeto Keriso ainge nombo asi simba mitia embo amina amita vasiri ta tongopa irae euja. ⁴Eto embo amuna ari sapura aisuja amo God ta ke pepeni poekasuja eto ke be amo ari sasapura tapa amo God ta ke peni avo poekasora. ⁵Eto ungo kiarira amo Keriso na embo ta ari sapura umbuto pambasi enda ta puvuna eto amita degi ari sapura tapa amo irae ⁶avoeto embo amita jo ta iresuja amo ari sapura matuainge aisuja embo amo God kiae be kiaera. ⁷⁻⁸Nau meniundi ungo embo nei ta ke ambo ambo ue degi aemo ta pambavojo, Keriso amo ari javotoho ari embo eto embo ari javotoho aisuja amite tapa God ta titi ta embo javotoho aisuja, rate Satan na itikari ta eto ari sapura ere ouva ainge embo amuna ari sapura matuainge aisuja amo Satan ta tohora. Rate Satan ta pure sosou asi God ta Meni enda ta puvuna. ⁹Eto God ta meniundi na ari sapura mane aisora amo God hajire avoeto, eto God amo enana ta mamo avoeto ari sapura amo toasora. ¹⁰Eto God

ta meniundi davore Satan ta meniundi davore amita etokiari erekira,
eto embo na ari sapura eto namei osa ae asuja embo amo God ta meni
manera.

Osa mine ara ari.

¹¹Eto ke peni itikari ta ingihava amo ungo osa mine ara evujo ¹²amo
embo Cain na ena ainge mane aisova amo Satan ta toho ena avoeto
namei tenu ambuna. Eto tenu ambuna amita be amo Cain na amo ari
sapura ere uaetija eto namei Abel amo ari javotoho uoi kogue tunga
osaga ere uaetija avoeto tenu ambuna ¹³agine nombo ungo ari javotoho
ere ova avo enda embo na kito ungo uje ae ururoro kito hotembari nei
avojo. ¹⁴Eto ungotena namei osa eora avoeto ungotena amburari toto
vasiri ta embari embopo amo ungotena kogora, rate namei osa ae embo
amo amburari ta matuainge iriuja. ¹⁵Eto namei uje ae euja embo amo
embo teore ambuora ainge ra eto tari amburari embo amina vasiri
te daroho mane iresuja. ¹⁶Eto namei osa ari amo eingera: eto Iesu na
ungotena avoeto vasiri amita avo toto ambuna ainge eto ungotena ue
namei kamei avoeto ungotenau vasiri toari haite aisora ¹⁷Eto namei
donda te amina namei nei donda ambu avo kito jo ae aisuja amina God ta
osa ari amita jo ta naingeto irou? ¹⁸Avoeto nau meniundi teho pe na ivivi
na ijirou mane osa aisora te ari be avo ururo ke be aisora.

God ta tombu ta hetasora

¹⁹Eto ari ainge ue amo ungotenau hotembari jo ta avo pehumba
mane aisora te God ta meniundi be hotembasora. ²⁰Eto ungotenau
jo ta hotembari avo pehumba ururo God sovera isapamane te amina
ungotenau hotembari tapa avo kito hondate aisuja. ²¹⁻²²Avoeto nau osa
ari embomeni ungotenau hotembari jo ta amita pehumba irae kito God
ta degi pari ijie amita tombu ta heteto pari ue jopapa mane aisora te
ungotena amita uje tapa eto amita ke tapa amo agi ereora avoeto do
penunu aisora amo ikau umbasora. ²³Eto ungotena do ara amita ke peni
iketija amo erekira: Ungotena God ta Meni Iesu Keriso hotembitie ke
be ijie osa mine ara ue irora etija ²⁴Eto amuna God ta ke agi euja embo
amo God ta jo ta mitia eto God amo embo amita jo ta mitia, eto amuna
ungotenau jo ta iriuja amita hajire amo amita Ahihi Otohu avo ungotenau
jo ta ikeuja.

Ahihi ta etokiari

4 ¹Nau osa ari embomeni ungota degi erena, embo na Ahihi ta sovera
na ke asi ijie puvuresora te God ta Ahihi Otohu retemo Ahihi neire
avo be eto kogo eto kivujo amo peroveta sokova neite neite enda ta tehue
mitera ²avoeto God ta Ahihi Otohu be amita etokiari ikena amo erekira

eto Ahihi Otohu be amo Iesu Keriso God ta degi puvuto bisi umbuna avo ke be aisuja ³te Iesu Keriso God ta degi puvurae ke asuja amo Ahihi nei avoeto Keriso ta kitohora eto Ahihi nei puvurari ke ingihava amo matu enda ta toreto ere ua. ⁴Te nau meniundi God ta Ahihi Otohu sovera peni vahai ungota jo ta mitia amina Ahihi sasapura enda ta mitia amo nembarira avoeto enda ta peroveta sokova amite tapa ungona nembarira. ⁵Rate enana enda ta toho avoeto enda ta ke avo ijiore enda embomeni na ingiora ⁶te ungotena God ta meniundi amina ke ijiore God ta toho na ingiora te God ta toho mane amina mane ingesora avoeto ke erena amo ke be ta Ahihi Otohu davore ke sokova ta Ahihi davore amo etokiasi emina eoi kiora.

Osa ari ta ke.

⁷Oio nau osa ari embomeni, osa ari God ta degi puvuja amo osa ari embo amo God ta meni ra eto God kiuja avoeto ungotena osa mine ara aisora. ⁸Eto God amo osa ari ta susu avoeto osa ae embo amina God mane kiuja. ⁹Eto ungotena God ta osa ari be kiora ari erevi ena: Ungotena vasiri amita degi umbuto daroho irora amita Meni avo vahai ikenu enda ta puvuna. ¹⁰Eto osa ari erena amo ungotena God osa eora avo mane rate God na ungotena osa eto amita Meni avo vahai amina ungotenau ari sasapura hamo amita ta bitou umbuto amburoja ikenu puvuna. ¹¹Nau osa ari embomeni, eto God na ungotena osa ue ari aingeko ena avoeto ungotena osa mine ara aetera. ¹²Eto embo amuna God titi na kiaera te osa mine ara ururoro God ungotenau jo ta mitie osa ari amita avo pajito inono aisuja. ¹³Eto God na amita Ahihi Otohu ungotenau degi overekena amina God ungotenau jo ta eto ungotena God ta jo ta amo kiora. ¹⁴Eto God Mamo na Meni enda ta embomeni orekaja ikena amo nango na titi na kia avoeto ke hande eora ¹⁵avoeto Iesu amo God ta Meni be ke asuja embo amo God ta jo ta, God amo embo amita jo ta ra ¹⁶avo eto God na ungotena osa euja avo ke be ijie be hotembeora. Eto God amo osa ari ta susu ra. Eto embo amuna osa ue iresuja amo God amo amita jo ta eto amo God ta jo ta iresuja. ¹⁷Eto ungotena enda ta mitie God ta hajire vahai avo ue iriroro ungotenau degi ta osa ari avo pajito inono au ke katari iji puvurop oju mane aisora te titi ta hetasora. ¹⁸Eto embo na ari sapura ta hajire avo oju aisuja te osa ue iresuja amina au oju avo irae asuja amo osa ari javotoho aita oju irae rate embo oju ue iresuja amo amita osa ari pajito inono mane aisuja. ¹⁹Eto ungotena osa eora amo God na matu osa arita eora ²⁰te embo na namei ta degi tumo ue God osa ari ke euja amo ke sokova ra amita be amo embo amina namei titi na kiuja rate osa ae ra te God amo titi na kiae ra te naingeto osa amo eoi? ²¹Avoeto God na ke peni erevi ikena: Eto embo na God osa asuja amo namei te tapa osa asuja.

Ungotena enda ta ari nembetera

5 ¹Eto embomeni amuna Iesu avo Keriso ungodtenau orekari embo be hotembasora amo God ta meniundi be asora, eto Mamo osa asuja amo meniundi te tapa osa asuja. ²Eto ungodtena God ta meniundi osa ere oretemo aere amita etokiari amo erekira: amo embo amuna God osa ue amita ke agi aisuja embo amina meniundi te tapa osa aisuja. ³⁻⁴Eto God osa ue amita ke agi aetera te ungodtena God ta meniundi avoeto sovera umbera amina enda ta ari nembetera avoeto God ta ke agi aisoram amo ngahia mane aisuja, eto ungodtena God tumota eora amina enda ta ari sovera eto nembeora. ⁵Avoeto erena amo enda ta ari sovera eto nembeora embo amo amunure? Amo Iesu avo God ta Meni be ke asuja amina nembasuja.

Iesu amo God ta Meni bera

⁶Eto Iesu amo God ta Meni be ra amo ari deina harikau kioro? Amo umo na bapataitounu God na “Meni nau be ra” ainge ijinu ingia eto nei amo teo sasaga bena ai ta ere kogora avoeto Iesu God ta Meni be ere kogora amo umo ta eto sasaga ta kogora. ⁷Eto avo pere mane rate Ahihi Otohu na harikeoi ingiora eto Ahihi Otohu amo ke be perekari euja avoeto harikeoi ingiora ⁸amo donda tapa heriso nei vahai amo umo te sasaga te Ahihi Otohu te amina harikeora. ⁹Eto embo na kito harikeore ingiora amo peni mane rate God na kito harikasuja amo pajire be ra eto harikari amita be amo hajire heriso nei vahai etena aravora ¹⁰eto embo amuna God ta Meni ke be aisuja amo hajire heriso nei vahai etena amina amita jo ta iresuja rate God na amita Meni Iesu ere harikitia avo tumota ae ue ke be ae aisuja amo God ta ke sokova ke eria aravora. ¹¹Eto God na ungodtenau degi ta ke hande ena amo erekira amo vasiri te daroho irari embo ta degi hande ikeuja amo Meni ta degi ta eto umbuora ¹²avoeto God ta Meni umbasuwa amita degi vasiri iresuja rate umbae amo vasiri iraera.

Vasiri te daroho irari

¹³Eto ke erekira ungodtenau degi ere kaitena amo ungo God ta Meni ke be erekira avoeto vasiri te daroho iresova avoeto be kiova ere kaitena. ¹⁴Eto ungodtena kiarira amo God na do hotembitia avo kogue penunu aisoram amo ingito ikau kesora ¹⁵avoeto ungodtenau pari God na ere ingihia avo ke be erera avoeto pari ta mine matu ere ikitia avo ke be aisoram. ¹⁶Eto embo na namei amo ari sapura ta pambasuwa amita Ahihi amo God na tau amburesuja avo kito namei avoembo pari ijirou God na vasiri ikasuja, rate ari sapura nei ururou God na kito embo ta Ahihi tau ambuto iresuja avoembo pari avojo. ¹⁷Eto ke be amo ari sasapura neite neite

tapa amo javotoho mane rate ari sapura nei nei amina embo ta Ahihi tari amburari haite manera. ¹⁸Aravora ungotena ere kogora amo God ta Meni Iesu Keriso amina God ta meniundi oreketo simba ururou Ari Sasapura embo Satan na tame ari inono ae ra avoeto God ta meniundi na ari sapura mane matuainge ue iresora te toasora. ¹⁹Eto ke nei ere kogora amo enda eto enda ta ari tapa amo Satan ta sovera na andirari rate ungotena God ta tohora. ²⁰Eto ke nei ere kogora amo ungotena God be avo kiora God ta Meni be amina puvuto sovera ari ikena eto ungotena God be eto amita Meni Iesu Keriso ta jo ta mitera, amo God be eto vasiri daroho irari ta susura. ²¹Nau meniundi ungo God sokova sakova neite neite avo eto kogoeto kivujo, aravora.